




TAPAK 10

Osaka-i Australian
Open kokogo

TAPAK 7

Terenlok atema Centre aser states-i
longjemer inyaktsüla: PM Modi



VOL. XVIII NO. 128 (ADOK 128) DIMAPUR

AMUNGNÜ (SUNDAY) TSÜKLAI (FEBRUARY) 21, 2021

₹ 5.00

COVID-19 Nagaland: Anogo anabubashingadak-ameputet

Kohima, February 20 (TYO): Anogo ana atongtepa Nagaland nung nisung ka dak danga COVID-19 aliba meputet. Külen, nisung ana taneptsü anguba ajanga tang nisung 18 dang anepaludar.

"Honibarnü nisung shinga dak-a COVID-19 aliba meputet. Kohima nung nisung 2 taneptsü angu" ta Health & Family Welfare Minister, S Pangnyu Phom-i metetdaksü.

"Nisung 12,191 rongnung 11,930 taneptsü nguogo aser iba ajanga taneptsü angur 97.85% kümogo" ta Health & Family Welfare Director, Dr Denis Hangsing-i ashi.

Nagaland nung COVID-19 puteter nisung 91 asüba nungi parnok 10 bo tanga timtem ajanga asü. Külen, nisung 152 tashi tanga state temi ogo, ta paisa ashi.

Tang anepalurtemji Kohima nung nisung 16 aser Dimapur nung 2 lir. Parnok rongnung Dimapur nung nisung ka dak dang shirangba yimya tera lir saka nisung 17 dakbo shirangba

yimya kecha mali, ta Dr Hangsing-i ashi.

Taneptsü angurtem: Dimapur (6,338), Kohima (3,792), Mon (594), Peren (506), Tuensang (246), Mokochung (183), Zunheboto (139), Phek (47), Kiphire (40), Wokha (35) aser Longleng (10).

"Nagaland nung COVID-19 alitsü akok ta temolung melemi bilemba sample 1,29,050 tendangogo. RT-PCR ajanga sample 74,573, TrueNat ajanga sample 37,300 aser Rapid Antigen Test ajanga sample 17,177 tendang" ta Dr Hangsing-isa metetdaksü.

"February 19, 2021 tashi nung Nagaland nung nisung 20,558 nem COVISHIELD vaccine dose 23,977 agütsüogo. Parnok rongnung frontline workers 12,149 aser healthcare workers 8,409 lir" ta State Immunization Officer, Dr Ritu Thurr-i metetdaksü.

"Healthcare workers rongnung nisung 3,419-i dose tanabuba agiogo" ta Dr Thurr-isa ashi.

Assam CM aser ULFA general secretary nati ULFA (I) dang mepishir

Dibrugarh/Guwahati, February 20 (Agencies): Honibarnü Assam chief minister Sarbananda Sonowal-i ULFA (I) C-in-C Paresh Baruah dang Quippo Oil and Gas Infrastructure Limited nung mapa inyaker nisung na chiochtsü atema mepishiogo.

"Onoki ULFA (I) dang Quippo nung mapa inyaktertem chiochtsü atema mepishiogo. Onoki olemteptsü molunga dang lir. Anungji ULFA (I) C-in-C Paresh Baruah dang ozüing alema mapa inyakba toktsür olemteptsü mepishiogo, kechiyong olemtep ajanga dang khuretem koktettsü" ta chief minister Sonowal-i ashi.

"Telungpur telok aikati ozüing alema mapa inyakba toktsüogo aser yimjung olemtep agir. Tawa telungpur telok aika temai adokogo aser olemteptsü renema lir" ta Sonowal-isa ashi.

ULFA (I)-i Quippo Oil and Gas Infrastructure Limited nung mapa inyaker nisung 2 chiochtsü atema Rs 20 crore meshir aser February 17 tashi nung sen agütsütsü lazükja liasü.

ULFA (I) ASER NSCN DANG MEPIR:

Külen, United Liberation Front of Asom (ULFA) general

secretary Anup Chetia-ia ULFA (I) dang parnoki pua aliba nisung ana dak kecha masütsü mepishia metetdaksüogo.

Abhijit Axom aser Paresh Baruah nati aniba ULFA (I) dang Chetia-isa anogo ishika agüjang ta mepishi.

ULFA (I)-i Pranab Kr Gogoi aser Ram Kumar na tepsettsü lemtetba meyipa reprangshitsüla aser totzü company den olemteptsüla, ta paisa ashi.

"February 17 nü Paresh Baruah-i kü den jembi aser ni ULFA (I) aser NSCN dang nisung ana metepsettsü mepishi. Tasüngji pai ano kü dangi phone asü aser Quippo ketdangpurtemi amalitepa mejembir ta ashi" ta Chetia-isa ashi.

"ULFA (I)-i totzü company nungi telangzüba tajung mangur, saka ni Abhijit Axom o Paresh Baruah na den ano NSCN lennirtem dang aremzüka atatsü aser mapa inyaker dak teka maitsü mepishiogo" ta paisa metetdaksü.

"Quippo ketdangsürtem dang ni amalitepa jembishinütsü mepishir. Iba tebilemstü angatetteptsü atema anatsülen nungi lenmang bushiteptsüla" ta Chetia-isa ashi.

Nagaland sorkar department temi Rs 1,287 crore tim mesüi amshi asütsü akok

Kohima, February 20 (TYO): March 31, 2019 tashi nung Nagaland sorkar department temi Rs. 526.77 Crore indang Detailed Countersigned Contingent (DCC) bills aser Rs 760.72 crore indang Utilisation Certificates (UCs) magütsüba ajanga Rs 1,287.49 tim mesüi amshi asü ta bilemer.

March 2019 nung tembangba financial year atema Comptroller and Auditor General (CAG) of India-osang agütsüba nung DCC Bills 291 tashi Office of the Accountant General ket nung magütsü aser iba jagi timi endok ta meshitettsü ta shia lir.

CAG indang report ya yakünü tembangba Assembly session nung Chief Minister Neiphiu Rio-i benoka liasü.

Rs. 526.77 crore timi amshiogo ta meshitettsü kechiyong sen endokba kuli kecha magütsü aser iba jagi tim mesüi amshi mesüra amajok nung endok asütsü akok ta bilemer, ta CAG report nungsa shia lir.

Department balala rongnung sen aika amshir Detailed Countersigned

Contingent (DCC) bills magütsürtem:

Home -Rs 89.93 crore indang Abstract Contingent (AC) Bills 113, Police -279.85 crore indang AC bills 52, Youth Resources and Sports - Rs 29.79 crore indang AC 38, Tourism Department -Rs 25.77 crore indang AC bills 16 lir.

UTILISATION CERTIFICATES (UCS) MAGÜTSÜBA:

CAG report nungsa kasa mapang Grants-in-aid atema Utilisation Certificates (UCs) 187 magütsüba shia lir. Iba ajanga Rs 760.72 crore amshiba kuli kecha mali.

Iba nung sen aika amshir Utilisation Certificates (UCs) magütsüba Department tem: School education -Rs 171.87 crore indang UCs 18, Industries & Commerce - Rs 27.39 Crore indang UCs 29, Youth Resources & Sports -Rs 14.88 Crore indang UCs 2, aser Health & Family Welfare -Rs 11.1 Crore indang UCs 16 magütsü.

National Pension Scheme: State sorkari National Pension Scheme (NPS) atema sorkar mapa

inyaktertem dang nungi Rs. 86.74 crore benden aser iba scheme atema sorkari lemsükba nungi Rs. 58.17 dang agütsü, ta CAG-isa metetdaksüogo.

State sorkari NPS kübok sen enoktsütsü lemsükba nungi Rs. 28.57 crore meinoktsü, ta CAG-isa ashi.

Sorkari sen Rs. 144.91 crore sarutetba nungi National Securities Depository Limited- NSDL nem Rs. 111.47 crore dang agütsü. Iba scheme nung lateta aliba ama sorkari NSDL nem Rs. 33.44 crore magütsü, ta CAG report nungsa shia lir.

NSDL nem Rs. 62.01 crore indang "short transfer" liasü. Ibaji Rs. 33.44 crore magütsüba + Rs. 28.57 crore short contribution lir. Anungji taruba financial year nung iba sentsühji keta lir, ta parnokisa ashi.

"State sorkari NSDL nem sen magütsü, mapa inyaktertem indang senotsü tim mesüi amshi aser iba ajanga sorkar mapa inyaktertemi tarutsü nung timtem ajurutsü akok. Iba tim masüba inyakyim ajanga iba scheme tamakok ajurutsü akok" ta CAG report nungsa metetdaksüogo.

Küm aika Public Sector Undertakings-i sen amshiba osang magütsü

Kohima, February 20 (TYO): Company temi financial year nung ita trok shia financial statements agütsütsüla aser ibaji Companies Act, 2013 nung lateta lir, ta Comptroller and Auditor General (CAG) of India-i metetdaksü.

Ajisüaka, March 2019 tashi nung State Public Sector Undertakings 5- Nagaland Industrial Development Corporation (NIDC) Ltd. Dimapur, Nagaland Industrial Raw Materials & Supply Corporation (NIRMSC) Ltd Dimapur, Nagaland Handloom & Handicrafts Development Corporation (NHHDC) Ltd Dimapur, Nagaland Hotels (NH) Ltd Dimapur aser Nagaland State Mineral Development Corporation (NSMDC) Ltd Kohima ajanga senotsü indang osang kecha magütsü, ta CAG report nung shia lir.

March 31, 2019 tashi nung State Public Sector Undertakings (SPSUs) indang arrears in accounts:

NHHDC Ltd Dimapur-i küm 9 indang magütsü. Tatembangba agütsübaji 2009-10 nung agütsü; Nagaland Hotels Ltd - küm 4 indang magütsü. Tatembangbaji 2014-15 nung agütsü; NIRMSC - küm 4 indang magütsü. Tatembangbaji 2014-15 nung agütsü; NSMDC - küm 2 atema magütsü. Tatembangbaji 2016-17 nung agütsü; NIDC - küm 1 indang magütsü. Tatembangbaji 2017-18 nung agütsü.

KÜMAIKA METEMBANGTETBA MAPATONGTEM:

Nagaland nung department 5 kübok küm pungu tema mapatong trok tashi metembang lir. Iba ajanga March 2019 tashi nung Rs 86.31 crore talila kümogo.

Mapatongtem:
1. Mineral Deposit area-i link Roads yangluba. Iba nung Rs

26.54 crore endoktsü asadanga liasü saka reprangshimer Rs 53.95 crore melen. Iba nung Rs 27.41 crore talila aküm.
2. Forest Colony, Dimapur nung Shopping Complex aser Parking Plaza yangluba. Iba ya Rs 18.56 crore endoka yanglutsüba liasü saka Rs 43.28 crore melenshi. Iba nung Rs 24.72 crore talila aküm.
3. Rs 28.17 crore endoka Mon-Namtola road Phase-II (42.25 km) yanglutsüba liasü saka Rs 47.74 crore melen. Iba nung Rs 19.57 crore talila aküm.
4. Rs 10.42 crore endoka Pukhungri-Avankhu-Layshi road yanglutsüba benok saka ibaji Rs 23.39 crore melenshi. Iba nung Rs 12.97 crore talila aküm.
5. Pftusero nung Playground yanglutsü atema Rs 3.50 crore enokba nungi Rs 5 crore mlenenshi. Iba nung Rs 1.50 crore talila aküm.

Manipur Anganwadi worker ka vaccine agiba sülen asü

Imphal, February 20 (Agencies): Manipur kübok Bishnupur district nung Anganwadi worker ka Covishield vaccine indang dose agiba sülen hopta ka lir asü.

Covid-19 vaccine agiba sülen arishi küm 48 tain Naorem Sundari temang nung timtem adok.

Sundari-i February 12 nü Covid-19 vaccine agi aser iba sülen anogo ka lir temang metaa shirangba den allergy adok, ta lar kinungertemi ashi.

Hokolbarnü la temang tamajungba akümiba agi Moirang community health centre (CHC)-i anir ao saka la idakji asü.

La asüba ya doctor-i mapa

shitak meinyakba ajanga liasü ta nübortemi tai tonglokja Kumbi Lai Sandhong nung lokti senden ka ayonga amen. Idangji la asütsüsa mapa inyaktertem merenshitsü takhangba agütsü.

La mang tendanga reprangtsü atema RIMS mortuary nung yua lir. Nübortemi lungkak aitha ajanga Moirang police-i medical negligence indang ken o ka benokogo.

Külen, Manipur Health Department-ia la asüba kuli bushitsü atema special team ka yoktsü ta metetdaksüogo.

Manipur Chief Minister N Biren Singh-i asür Sundari'er kinungertem den ajuruteogo.

"Kumbi Terakha nungi Anganwadi Worker W Sundari'er kibong den ajurutepa osang metetpelaogo aser mangyimba osang anguba sülen teyaritsü tim yaritsü nangzükgogo aser aibelenba ketdangsürtem merenshitsü tetuyuba agütsüogo" ta CM Biren-i metetdaksü.

"Sundari-i COVID vaccine agütsüpur dang la allergy timtem lir ta ashiba lar kinungertemi kü dang metetdaksüogo. Ajisüaka, la nem vaccine agütsü" ta Bishnupur district Deputy Commissioner Neeta Arambam-ia osangbener dang ashi.

Care & Support Children Home nung quilts lemtsü



Dimapur, Tsüklai/February 20 (TYO): February 17, 2021 nü Care and Support Children Home nung quilts (tebentsü sü) lemtsüba sentong ka agiogo. Managing Director cum Chief Functionary (MD cum CF), Care and Support Society Imchawati Kichu-i achaayanga NEI nung Social Action (CASA) development program atema Church's Auxiliary den lonejemer Care and Support Children Home nung tanurtem nem quilts lemja liasü.

Iba sentong nung Sanpangchang Longkumer, EAC Ongpangkong, Mokokchung District aser head

DB-i anir DB ana dena liasü. EAC-i sentong nung staff tem dang tanurtem tajungtiba nung anitetsü ajungshiba den tanurtemia temaba jenjang atongtsü atema ajemalua meranga inyaksü ajungshi. Paisa, Managing Director cum Chief Functionary Imchawati kichu-i, Orphanage aser tanga inyakyim balala ajanga district aser state nung lokti nung temelenshi bener arutsü atema anibelen mesasai tanenmakai inyakba atema pa nem tenüngsang agütsü.

Kasa mapang nung Head DB-ia, Care and Support Children Home nung aliba

tanurtem ajungshi aser Managing Director cum Chief Functionary-i anir par team-i mapa tajung inyakba ngua pelaba lemsatep. Maneni MD cum CF-i, State Coordinator, CASA Nagaland Vanjamo Murry-i, kanga süoki ia Nagaland nung tenüngdakbapurtem nem maongka kasasa agütsü atema inyakba atema aser talisa Mokokchung district nem quilts ana agütsüba atema pelaba lemsatep, ta Care and Support Society, Mokokchung M. D cum CF Imchawati Kichu-i sangdong ka ajanga metetdaksü.

Bhandari nung drug free India campaign sentong agi

Dimapur, Tsüklai/February 20 (TYO): ARK Foundation aser Bethesda YWC den longjemer temesepba mozü beshiba nokdangtsü aser Treatment dak sendakba nung Social welfare Department-i ayongzüka Bhandari town hall nung February 19 nü sensitization workshop ka agiogo.

Iba sentong nung lokti tentet balala, Ngo, temesepba mozü achirtem aser tongtubang nisungtem aikati shilem. Sentong nung shisalen agütsürtemi temesepba mozü amshiba dak sendakba nung onük balala dak ajemdaker tangazükba agütsü aser local

shareholder tem indang shilema lemsatepa liasü.

SDO (C) Bhandari, Sulanthung-i, lanurtem dang temesepba mozü aser moko achiba nungi pilaa alitsü ajungshi, koba ajanga tekelok, tanüla aser shitemang nung kongshir. Paisa, temesepba mozü achiba ajanga nükjidong metongteti tom nung toktsür aliba kaketshirtem aika pei kibong aser lokti-i sentoker ta ashi

Kasa mapang nung ARK Foundation tir Ketho Angami-i, temesepba mozü amshiba angatetsü asoshi prone strategies, Drug use & Law, Prevention aser treatment, ta

onük asem nung ajemdaker jembi. Executive Director Bethesda YWC, W.C. Humtsoe-i, Bhandari tesem nung temesepba mozü amshiba ajanga ken o balala adokba indang lemsatep. Maneni Moang Jamir-i, temesepba mozü achiba aser yi ajemba dak sendaka aliba ken o tem aser stakeholders tem indang shilem lemsatepa liasü.

Sentong nung anküp o Asst Director & Nodal Officer Drugs Department of Social Welfare, K.Wango Langsym-i jembi. Iba sentong CDPO Bhandari, T.Y Peter Yanthan leisüba kübok agia liasü.



Alima Tetsü Oshi anogo amongtsü jelia Nükmen Baptist Arogo, Dimapur nung Tsüklai 20, 2021 Küptoknü Ao oshi terenlok onük nung shisalemsatepba sentong ka agiogo. Iba sentong nung onük jembi Tir Yimiyim yimozulür K.Temjen Jamir liasü. Iba sentong nung Ao oshi renloktsü atema arogo lenirtem den lanurtemi shisatsü tajung aika lemsatepa liasü. Iba sentong temer onük jembi den arogo aser lanur lenirtem agiba noksa ka yangi angur.

Mr & Miss Nagaland mega model hunt season-1 ayonger

Dimapur, Tsüklai/February 20 (TYO): RCEMPA Jotsoma Kohima nung April 24, 2021 nü Mr & Miss Nagaland mega model hunt season-1 grand finale agitsü aliba dak sendakba nung February 19 nü June island restaurant Kohima nung Nagaland mega entertainment senden ka mena liasü.

Nagaland mega entertainment-i, 2020 grand finale koba June 13, 2020 nü agitsü lateter liasü iba anogo ya covid-19 wara poktetba ajanga thinen. "Onoki Mr & Miss Nagaland mega model hunt season-1 thinentsüsa aküm," ta tir Samuel Achy Phom aser General Secretary Neisa

Rupreo nati ashi.

Nagaland mega entertainment-i ayongba sentong nung takok angurtem Mr and Miss India globe aser northeast India nung indang indanga tokteptsü.

Sentong ayongertemi sangdong ka ajanga ashiba agi, Nagaland mega model hunt ya sempet aketba Naga nunger models tem ajungkettsü aser parnok nem state adena orr sabang balaka agütsü asoshi lir. Maneni iba setnogn ajanga tejangrartem nem parnok nükjidong tongtettsü atema teyari agütsü, shirnok asen state nem konang tetushi bener arutsü atema renema lir.

Dimapur nung temesepba mozü apu



Dimapur, Tsüklai/February 20 (TYO): Nagarjan tesem nung ozüing alema temesepba mozü shibelenba osang angazükba sülen Excise Narcotic personnel temi iba tesem meita ao. Hopta tsüingda aiben merandangba sülen Half Nagarjan, Dimapur nung alir Santosh Rai'er jabaso Bisu Rai (27) ket nung Heroin gram 300 bener lia apu. Temesepba mozütem ya soap cases metsür 25 nung sepet liasü aser talep shia gram 12 shi liasü.

Aija alisang ya NDPS Act

1985 kübok section tapettem nung ajemdaker puogo aser iba ken o maneni bushitsüingdangdar.

Duty party-i ozüing alema inyaksagshiba maparen aputsü atema tanen makai inyakba ya tushitsü temsüa lir, koba temesepba mozü amshiba aser ozüing alema shibelenba nokdangtsü atema inyaktepba nung kanga tongtiba shilem ka lir, ta DY Commissioner of Excise (NC) S.Chanlei Angh-i sangdong ka ajanga metetdaksü.

Govt. School tesayurtem nem training agütsü

Dimapur, Tsüklai/February 20 (TYO): Pratham Education Foundation den senteper Department of School Education, Nagaland-i, Govt. School tesayur 1000 shi atema anogo pezü online training programme 'Gurushala' ayongzüka katsüogo. 'Gurushala'sentong ya Indus Towers Limited aser Vodafone India Foundation-i ayongzüka agiba sentong ka lir.

Class 1 nungi 8 tsüingda tesayurtem nem 'Remote techniques for parent & student engagement, assessment methods and post lockdown strategies' omen nung ajemdaker January 15 aser 16 nü tangzükba agütsü aser class 9 nungi 12 tashi tesayurtem 'Remote techniques for parent & student engagement, content creation and post lockdown strategies' onük nung ajemdaker January 18 aser 19 nü tangazükba agüja laisü.

Iba training sentong nung tesayuba tasa balala sayu aser

iba ajanga tesayurtem Remote/ Online tesayuba nungi classroom tesayuba dangi ayonga ayonga meyipa otettsü. Training sentong lapokba mapang Principal Director, School Education, Nagaland, Shanavas C, IAS "iba ya tetenzüker ka südakjang kechiyong asen state nung tesayuba aser education atema tanga lenmang kati ayaoka aitsü mapang tongogo," ta ashi.

Gurushala-i amenokba online teacher portal 'www.gurushala.co' nung angati agi tesayurtem atema jenjang temaba nung tangazükba agütsür. Gurushala ya tang website ama aser Google Play Store nungi download süa application ka ama amshitetsüsa angutsü. Website ya tesayurtem tsayuba jenjang ajungkettsü atema lir aser iba ajanga kaketshirtem tangazükba ajungkettsü aser remote teaching-ia den lenlang ajak nung kaketshirtem nem terenlok bener arutsü.

Myanmar nungi Zo nunger Mizoram nung arua jenoktsü akok



Indo-Myanmar arrtsü (file)

Aizawl, February 20 (Agencies): Myanmar nung mitkartemi sorkar atsüngdokba sülen timtem ajurur Zo nungertem Mizoram nung arua jenoktsü akok ta Mizo Students' Union (MSU)-i metetdaksüogo. Myanmar nung amenoka aliba telungpur telok kati parnok kinungertem Mizoram nung jenoktsü asüngdangba sülen MSU-i iba ya shiogo.

Myanmar nung Zo nungertemi timtem ajuruba ajanga Mizoram nung arua jenoknura, pelashishia agizüksü ta parnoki ashi.

MSU-isa Mizoram sorkar

dang Myanmar nungi refugee temi nüngdakba teyaritem agütsütsü atema ayongzükogo.

Chin National Front (CNF) indang armed wing Chin National Army (CNA)-i tawa tu parnok kinungertem Mizoram nung jenoktsü atema asüngdanga liasü.

Champhai district nung deputy commissioner Maria CT Zulia-i ashiba agi "CAN-i Mizoram nung parnok kibong 40 anenzüksü atema asüngdang."

CAN-i Farkawn yimtsüing nung village council president den tongtep, ta laisa ashi.

Mizoram-i Myanmar den kilometer 404 tashi arrtsüa lir aser Zo nungertem ya Mizoram den arrtsüa Chin state nung timba lir.

Myanmar nungi Chin nunger meyrjang aika Mizoram nung arua lidar. Alemli mapang nungi Mizoram nung kin ka Chin nunger den sendaktepa lir.

1980s mapang Myanmar nung mitkartemi yimsü asüba mapang Chin nung aika Mizoram nung arua jenok.

Myanmar nung democracy sorkar akümba sülen parnok aika meypa ao saka ano aika Mizoram nung lidar.

Prafulla Kumar Mahanta temang tajungba lir

Guwahati, February 20 (Agencies): Taoba mapang Assam nung anaben tashi chief minister inyaker Prafulla Kumar Mahanta temang tajungba lir.

Mahanta temang tajungba lir ta asübaji pa kinungtsü Jayashree Goswami Mahanta-i metetdaksü.

Mahanta temang mejungi akümba ajanga Brihostibarnü tayimtsü ajanga All India Institute of Medical Sciences (AIIMS) New Delhi-i anir ao.

Taoba Assam CM ya teku nung tashitsü atuba den high blood pressure agi kangshiba ajanga January ita nungi Guwahati nung nija mozü ki ka

nung anepalua aru.

Prime Minister Narendra Modi-i 7, Lok Kalyan Marg nung arishi küm 68 tain Mahanta kinungtsü Jayashree Goswami Mahanta aser jabaso den ajurutepa liasü.

Iba mapang Modi-i Mahanta temang indang osang metetpela aser tajungba akümtsü moatsü.

Yaküm September ita nung Asom Gana Parishad (AGP) lennir Mahanta ya Guwahati nung nija mozü ki ka nung mezüing anioka anepalua liasü.

Iba mapang pa intensive care unit nung anepalu saka temang tajungba akümba sülen anizük.



Sikkim nung aliba Geyzing college kaketshirtemi Hokolbarnü infrastructure tajungba kümang ta takhangba agüja lungkak aйдang agiba noksa angur. Iba lungkak aitba sentong nung shilem agiba atema Geyzing college ketdangsürtemi kaketshir pezü aridok. Iba inyakyim ya Sikkim Progressive Youth Forum (SPYF)-i aitsür aser parnoki State Education Minister den ajuruteptsü takhangba agütsüogo. (Gangtok, February 20)

Feb 22 nü PM Modi-i Assam nung mapatong aika lapoktsütsü



Guwahati, February 20 (Agencies): Prime Minister Narendra Modi-i Hombarnü election agitsü aliba Assam aser West Bengal state tem semdangtsü aser mapatong aika

lapoktsüba den lung azüngtsütsü.

Assam kübok Silapathar nung PM Modi-i linük asoshi oil & gas sector nung tongti mapatong kar tenzüksütsü aser engineering college tem yanglutsü atema lung azüngtsütsü, ta PMO-i metetdaksü.

Kasa anogo nung Moid-isa West Bengal kübok Hooghly nung railway projects aika lapoktsütsü.

Assam nung PM Modi-i Indian Oil indang Bongaigaon refinery nung INDMAX unit lapoktsütsü,

Dibrugarh nung Oil India Limited indang secondary tank farm aser Tinsukia nung gas compressor station lapoktsütsü.

Paisa Dhemaji Engineering College lapoktsütsü aser Suakuchi Engineering College indang lung azüngtsütsü, ta PMO-i ashi.

"Item mapatong ajanga energy security aser azükaru bentsür aruba den lanurtem nem mapa inyaksü maongka agütsütsü. Iba ya Modi-i "Purvodaya" alizüing ayuba ama inyakba lir" ta PMO-isa metetdaksü.



February 20, 2021 nü National People's Party (NPP)-i Assam State Adhoc Committee tentetba sülen agiba noksa angur. NPP National General Secretary in-charge of Finance & Assam State Election In-charge, James P K. Sangma-i ketdangpurtem shima liasü. Assam nung assembly elections agitsü aliba jakdang NPP-i Assam State Adhoc Committee tentetogo.

Meghalaya sorkari entrepreneurs yaritsü

Shillong, February 20 (Agencies): Meghalaya sorkari taruba küm ana atema Promotion and Incubation of Market-driven Enterprises (PRIME) fund ama Rs 125 crore ayutsü aser iba yagi state nung entrepreneur tem pusemstsü.

PRIME Entrepreneurship Awards sentong nung Chief minister Conrad K Sangma-i MBMA ketdangsürtem, North East Small Finance Bank, SBI aser Meghalaya nung entrepreneurs o artisans den jembidang iba osang metetdaksü.

"MBMA-i mapa tajung inyakba atema tenüngsang

agütsür. Ateliers Programme aser PRIME Meghalaya ajanga artisans aser entrepreneurs-i maongka anguba atema pelar" ta Conrad-i ashi.

Conrad Sangma-isa Meghalaya nung kenteneritem nem 'Chief Minister's Music Award' agütsütsü ta ashi.

Sentong nung MBMA CEO Dr. D. Vijay Kumar-ia Delhi nung Meghalaya indang tourism store ka lapoktsü osang metetdaksü.

"Iba atema sentong renemdar aser iba nung Ateliers-i parnok indang products aser crafts Delhi store dangi belentsü" ta paisa ashi.

Assam Cabinet-i süngolu mapa inyaker taa Rs 217 kümtsür

Guwahati, February 20 (Agencies): Assam State Assembly election 2021 nung rangloker Assam Cabinet-i Honibarnü süngolu nung mapa inyaktertem indang anogoshi taa ajungkettsüogo.

Assam chief minister Sarbananda Sonowal-i aniba State Cabinet senden ka nung süngolu nung mapa inyaktertem indang anogoshi taa Rs 167 nungi Rs 217 tashi kümtsü.

Assam parliamentary affairs minister Chandra Mohan Patowary-i Sonowal-i aniba Cabinet telemtetba agiba osang metetdaksüogo.

Assam süngolu nung mapa inyaker teloktemi anogoshia Rs 351 agüjang ta takhangba agüja lungkak aityonga arur.

Assam nung tang süngolu

mapa inyaker nem anogoshi Rs 167 agütsür.

"BJP sorkar mapang taoba mapang süngolu nung mapa inyaker taa Rs 30 tutsü aser tang Rs 50 tutsüba züingsema, Rs 80 tashi tutsüogo" ta Minister Patowary-i ashi.

Süngolu nung mapa inyaktertem nem anogoshia rations atema Rs 101 agütsütsü, ta Patowary-isa metetdaksü.

Ration atema Rs 101 agütsübaji züingsema süngolu nung mapa inyaktertemi anogoshia Rs 318 taa angutsü, ta paisa shisem.

Ajisüaka, Assam sorkari süngolu company tem dang sorkari latettsüba taaji agütsütsü atema jembitettsü asü masü'ar meshitet.

Artsakh rara sülen Armenia Khristantem maneni timtemer



Dadivank nung aliba Armenia nunger Khristantem temeshi aini aoba tesem- Armenian Monastery noksa nung angur.

February 20, 2021: Anogo 44 tashi nung Artsakh tongbang rara sülen tangbo Azerbaijan linüki Dadivank nung aliba Armenian monastery-a agiadokogo; tawa Armenia Khristantem telok ka temeshi aini Armenian monastery-i aoba mapang nung parnok nokdanga liasü.

February 7, 2021 nü Armenia Khristantem telok kati iba monastery semdangtsü ao, parnok den Russian peacekeepers-a liasü. Iba monastery ya khen nung nisung 30-i dang semdangtsü melar. February 7 nü Khristantem

monastery jagi aodang nokdang aser anasa aliba yim ka nung ata-a liang ta metetdaksü. Khristantem jagi ano monastery jagi aotsü merang saka iba monastery semdangtsüpurtem tenüngji jelia agütsütsüla, ta metetdaksü.

February 14 nü tesüsa Khristantem jagi iba monastery semdangteta liasü.

Azerbaijan-i maneni yimtenren tashi amshia Armenia nunger Khristantem nem timtem agütsür. Tawa Azerbaijan Tır, İlham Aliyev-i National Hero & Patriotic War Hero awards atema tenüng

sangdonga liasü aser Ibad Huseynov-i National Hero award angu.

Huseynov ya mezüngbuba Nagorno-Karabakh tongbang nung shilem agir ka liasü; iba tongbang nungji pai Armenia nunger Khristan sepai ka tekolak tangzükba mangko amer tangokba noksa ka lemsatapa liasü.

Turkey Tır, Erodgan-ia Huseynov nem tenüngsang agütsüogo.

Azerbaijan nungeri Armenia Khristantem anema maneni inyaker aser meimchir temeden anema inyaker.

Sudan nung Muslim nungertemi ano Tenla ki ka rongdoktsüogo

Juba (South Sudan), February 20, 2021 (Agencies): Sudan linük nung Muslim nungertemi ano Tenla ki ka rongdoktsüogo; tesüiba küm ana tsüngda tang agi Tenla ki 9buba rongdoktsür, ta osang ka ajanga metetdaksü.

Muslim yimsü alia amangertemi Khartoum nung Al Jazirah state kübok Tambul area nung Sudanese Church of Christ (SCOC) Tenla ki rongdoktsü, ta SCOC mission nung tekolak, Rev. Kuwa Shamal-i metetdaksü.

January ita tetenzüklen social media nung Khristantem anema tesempa o kanga prokba sülen mapang tatsüka dang lirbo iba Tenla ki rongdoktsü. Tambul nung aliba SCOC Arogo nung pastor, Jubrial Tutu-i, Tenla ki rongdoktsüba ya Khristanatem reshikangshiba den kasa lir, ta ashi.

Pastor Shamal-i, Amongnü SCOC Arogo Tenla kidang tamangertem tekülem sentong agir sentep senshiba sülen minute ishika tsüngda iba Tenla ki rongdoktsü, ta ashi.

Tambul area nung Khristantem atema iba Tenla ki dang liasü, anungji Khristan denomination balalai iba Arogo nung adener.

"Parnoki iba Tenla ki rongdoktsü, kechiyong parnoki iba area nung Kangki temaitsü mereprangner," ta Pastor Shamal-i osangbener dang ashi.

Social media nung ocet

balala ajanga Sudan nung Muslim nungertem dang Tenla ki asütsü atema Arogo ketdangsertem nem ali magütsütsüla, ta proka liasü.

"Muslim nunger aliba yimtitem mesüra yimtsüngtem nung Muslim nungeri mamangertem dang Tenla ki yanglutsü memelatsüla," ta social media post ka nung lemsatep.

2019 küm nungi tenzüka tang tashi nung Tambul area nung Tenla ki 9 rongdoktsüogo, ta Khartoum nung Khristan temeden atema inyaker attorney, Demas Mragan-i metetdaksü.

2019 küm nungi tenzüka tang tashi nung Muslim yimsü alia amangertemi Omdurman nung Tenla ki pongu rongdoktsüogo aser Khristantem dang nenoki Tenla ki yanglura tepsettsü ta amokmerena liasü.

Omduram kübok Dar-El-Salam area nung tekülem ki ka rongdoktsüba ken o nung yaküm December ita nung police-i Muslim yimsü alia amanger nisung 14 nungi nisung 9 pua liasü, ta Khristantem tenüng nung okatsür, Demas-i metetdaksü.

Muslim nungertemi iba area nungji Khristantem melidaktsüner, ibayongji parnoki 2019 küm January 19 nü, 2020 küm January 4, January 19, January 28 aser August 7 anogotem nung Tenla kitem rongdokja liasü.

Amokmeren liaka August 7

nü Tenla ki rongdoktsüba sülenbo Arogo lenirtemi police nem ken o agütsütsü lemteta liasü.

Police-i iba ken o agizüktü memelung, ibayongji parnoki Demas teyari agia tan ita tetenzüklen police nem ken o agütsüba sülen nisung 9 apu.

2019 küm Sudan nung taoba Tır, Omar al-Bashir-i aniba sorkar atsüngdokba sülen sorkar tasenbaibo linük nung tamangba yimsü ajak sadoka amangtsü temeden agütsü, ajisüaka iba linük nung Khristantemi maneni timtem aika ajurur; item rongnung Tenla ki asütsü atema ali manguba densema lir, ta Demas-i metetdaksü.

Sorkar tasenba yimsüsüba kübok Khristantem nem-a kasa temeden agütsütsü ta imlaa liasü, ajisüaka sorkar ketdangsertemi Muslim nunger dang pusema inyaker, ta Demas Mragan-i ashi.

2019 küm April ita nung Bashir sorkar atsüngdokba sülen 2019 küm December ita nung U.S. State Department-i Countries of Particular Concern(CPC) linüktem tarensen nung Sudan linük agienba osang sangdonga liasü.

1999 küm nungi U.S. State Department-i Sudan linük ya CPC nung züngsema liasü.

Alima nung Khristantem tamajungba reshikangshiba linüktem rongnung Sudan linük ya jenjang 13buba nung lir (Open Doors' 2021 World Watch List).

ANO GO ABEN TSÜNGREM DEN

TEKÜMZÜKER SANNÜKER

"Saka atangji sayuba den apet O nai jembiang." Tita 2:1
Ano teyari asoshi tangatetba tanelaji külem temeshi pur telungjem aser Tsüngrem tenzükertem arur. Khristan shinga peisasa agi teperiba makümer. Telok ka kisüng agi tabensa mekümtetter. Asenok kati ka nüngdaker. Kodang asenok shirangdir temang ajunga agi iba mesen anema rarar. Kasaji tiyazü tesayuba mopung aser yipru anema raratsü asoshi liyim arogo (Khrista Temang) aser Pa lima rangpen Temang nüngdaker. Asenok joko tiyazü tesayuba mopung agi septsü tentsü len monshidaktsütsü asoshi arogo nung tenzüker balala nem shia aruba Khristai sempet balala agütsü (Ef. 4:11-16).

Yihuda nunger masüba Khristantem mejeptoktsü jembitsü Yirusalem mungdang jatepba nungi asenoki lesson ka angazüker. Kecha tependang meli-i Tanela Temeshi meküploktsüba tenyar Peteri kuli asü (T.M. 15:6-9). Iba indang Yakobi kechi "zülua" lir ta meyipa ashi (t.13-17). Aser ibai obang ka küma hai-aura katepa renem (t.22-28). Iba nungi tamangertem asoshi "tepela", "tajungshiba" aser "tashi" angu (t.30-32).Tamburtem aser tanishirtem dang asüngdangbaji Arogo otsü bushiba lir.

Kümdanga bushiba ajanga Arogo nung tesüiba pututem nung mapa tasen adoka sayua arubaji walok-watem tekülemba liasü ta bushiteta arur asüngtetdaksü. Asentenshi mapang nung Tsüngrem mapa den küpteptsü asoshi Satan aser pa tenyartem mazüngi mapa inyaker. Ibai tesüiba Tsüngrem mongin. Jonathan Edwards ama taküm kuli lir (1703-1758). Pa iba putu nung America nung philosopher aser theologian tulutiba liasü.

Tanü tesayuba nung tashishitsü aketba tasüngdangbatem noktangtsü asoshi tangara lir, "Süngjangji reprangang." Saka taküm yimya melenshibaji dang "süngjangji" masü. Osangtajungji kanga tashi tait lir, nai ibaji tanga den meyoktepaka iba nung tajung kar adoktsü! Yisu dang nütsüngtemi parnok chiyongtsü bushitsü yokadokang ta ashidang, pai parnok dang chiyongtsü agüjang ta ashi, "Ni lokti asoshi aria bilemer" (Mt. 14"!5, 16; 15:32). Sannüker kaji santem asoshi aria bilema chiyongshidak; tesayuba shidak agütsür lir.

Satania kotak tenyar ama kümer sayutsü akok, saka mapaji tatem anogo nung metettsü (2 Kor 11:13-15).

Temeim Oba Tsüngrem, temeshiba aser memeshiba bendangtettsü tanela shisatsü kü nem kua. Yisu tenüng nung sarasademmer, Amen.

Nigeria nung tesünep alitsü atema putirtemi sarasademsü mepishir

February 20, 2021: Nigeria nung Khristan putirtemi Khristantem dang linük nung yimjung aser tesünep alitsü atema 'Lent' mapang nung (February 17 nungi April 3, 2021 tashi) sarasademang, ta mepishia metetdaksü.

"Nigeria nung asenok timtem tulu nung lir. Asenoki Tsüngrem taochi nüngdaker. Tsüngrem taochi medenibo asenoki kecha mesütettsü," ta February 17, 2021 nü Oyo nung tongti putir, Emmanuel Adetoyese Badejo-i metetdaksü.

"Iba (Lent) mapang nung asenoki Nigeria amakba wara tapu balala anema raradi, kechiyong asenok rongnung Covid wara dang masü wara tapu aika lir. Ochimashi, junga yimsü masüba, ketdangsertem ochimashi, tejak repranga inyakba, ochi temeden magütsüba, nübur meyong senotsü auyaba, sen akhangtsü atema nisung apuba, mapa manguba aser temenen mapatem ajanga anogoshia nisung aika timtemer aser aika asür," ta paisa metetdaksü.

"Asenoki item lendong ajanga takoksa angurtem jangjatsüla aser parnok yaritsüla," ta pai ashi.

"Khristantemi talisa ochi jembitsüla; yimtenren,

rongsenkettsüng aser sorkar tenzüker menenpurtem den jembitsüla," ta pai ashi.

Paisa linük nung lenirtem dang ochishia alitsü aser linük tesem ajaklen rara anendaktsütsü atema inyaktsü ayongzük.

Tashi tulu alirtemi itemji meinyaktetra Tsüngrem nungi temerenshi angutsü temsüa lir, ta pai ashi.

Nigeria nung Khristan putirtemi mapang ajak nung sorkar aija arur aser ketdangsertem ochimashiba dang masü saka lenirtemi linük nung sensotem-a meküzmzükteter, ta aitsür.

Auchi nungi tongti putir, Gabriel Ghieakhomo Dunia-ia Khristantem dang Nigeria linük nung tesünep aser yimjung alitsü atema anogo 40 nü sarasademba nung shilem agitsü mepishia metetdaksü.

"Sarasadem, lumiba aser tenüngsang agütsübaji asen menen atema taneptsü lir ta Kibuba Tsüngremi asenok dang sayur, ibaji ajanga asenok tazüngla akümer aser alima nung kecha mangur. Lent mapang nung Khristantem meyrjang aikati sarasademba ajanga linük nung senso ajak asoshi tesünep aser azükaru alitsü," ta pai metetdaksü.



TIR YIMYIM YIMOBILEM (EDITORIAL)

DIMAPUR AMUNGNÜ, TSÜKLAI (FEBRUARY) 21, 2021

AJAKI JEMBINÜBA OSHI

Tanü ya Alima Tetsü Oshi anogo lir, anungji tanübo asenok ajaki asen tetsü oshi tajung agütsüba atema Tsüngrem tenüng sangdi aser ano asen tetsü oshi mesamadaktsüi tajungba aser teimba kuma renloka aotsü asoshi Ao Senden Literature Board nung bendanga agüja inyakerkem, kaket zülurtem aser osangkaket nung adoka züngdaktsütsüsa ocet tapu balala zülurtem ajak tenünga sangdi. Mezüng lipok dang, alima nung alir ajak kin ka kümer longjema alitsü asoshi Tsüngremi alijak nung alir ajak asoshi oshi ka dang agütsü, anungji parnok rongnung kati ka dak temulung malemtsüsa kecha melii parnok longjema liasü, saka kodang nisungtemi pei mulung nung asüküma parnok shisatsü, temetetba aser tashi agi yanglutet ta tenüng ayutsü atema anüng tashi tua longki asütsü tenzükba Tsüngremi angu, Pa mepela anungji Pai nisungtem rongnung mangatettep adoktsüsa parnoki jembiba oshiji (aika kuma) benjatsü ta Lipok tapu 11 nung shia angur. Iba nung jagi tenzükba alima nung kin shiai jembibaji pei tetsü oshi aküm. Aji oda, Tsüngremi mulungba inyaka Pa akümtsüba ali tashi asenok nem agütsüba oshi agi asenok longjema alitsü aser asenok longjemba tashi agi asenoki Tsüngrem sentsüwangshi asoshi mapa tulu inyaktettsü. Küm ishika ogo, asen Ao oshi ajanga asenok longjemdaktsü aser tangar asoshi mapa tajung tulu inyaktettsüsa Tsüngremi tashi agütsü. Aji oda, asen oshi ajanga tangar aika Tsüngrem temeim meteta aru, aika alima shisa tenük lapok, aika taneptsü angu aser aika taküm jenjang tajung ajangzüktet. Ibayongji, Ao oshi ya ajaki kanga sapua jembia aser Ao oshi jembirtemji mera ketketa reprang, kechiyong parnokji Tsüngremi temetetba kin, temeim aketba nübor, teyarinü aser tejungnü, mapa ajak nung kanga nendaka ochishia inyaker aser kong lidir liaka ajak den putepa litetter nisungtem liasü. Ajisüaka, kodang asenoka, akhi nisung Shinar lenden nung longki anüng tonga tua yanglutsü apusortem ama, Tsüngrem asoshia masü aser tangar atemaa masü saka pei tenüng agitsü atema anüng tashi tua kaketshisatsü bushitsü tenzük aser takar akümtsü atema rongsen bendentsü apuso, asenoki asenoksasa asen tetsü oshi mesapui aküm aser asenoksasa asen tetsü oshi jembitsüa akmesena kümdaktsü. Iba jagi tanü asenok aika kibong nung tsürabur o tanurtem na tsüngda oshi mangatetteptsüsa kumogo. Tanurtemi Ao mashi aser tsüraburtemi English-a mashi aser Nagamese-a junga mejembitetar ta kenüa kibong nung kinunger ajak külemi longjema pei tetsü oshi agi shisalemsatapa sensaksemba aser kibong tekülem agiba mapang majurudang tanur tain kümer kibong akümba lanur kibong aika kümdagi. Item kibongtem nungji pei tetsü oshi mejembir aser bendanger oshi agia tebilemba ajak shia sensaksem makatetter. Tanü asenok lokti aser yimten nung tebilemtsü adokbaji kibong nung tetsü oshi agi sayutsüngi o ashiba aser sarasadem mapang agiba mapang tajungtem anenba nungi tenzükba lir. Alima nung koba oshi südirsiüaka tajung, saka tangari dena pei tetsü oshi jembitsübaaji oshi jembirtem jakla yimya dak keta lir. Alima nung English oshi ajaki sapua, pei tetsü oshi jembitsüba dang nungi nüma tadangba, jembitsüsa akümba ya English oshi ya Ao oshi ama asenok tetsü oshi dang nungi olasü tajungba asüba agia masü aser takarba asüba agia masü saka English oshi jembirtem England aser America nungertem jakla aser maparen ajungba agi lir. Parnok shisatsü aser tashitemetet agi alima ajak ramoka yimsü asüba agi ajaki akümtsübur aser alima tesem kongsa nübortem timtemba angur yangji tonga oagi parnoki teyari agütsütetter, anungji alima nung English jembir kintemji ajak asoshi tanüker, teküzmzüker aser teyarir lir. Iba jagi ajaki parnoki jembiba oshiji jembiner aser jembir. Kasaji asenoki asen tetsü oshi mesamadaktsüi renlokdaaktsünüra, asenoka asenoksasa tangar asoshi teküzmzüker aser teyarir tajung kaka akümtsüla. Iba jakla yimya tajungji ngur, ajaki Aotsür Aor kümnütsü aser Aotsür Aor kümnüba nisungtem jagi Ao oshi kanga sapua jembitsü. Aji oda, Ao oshi ya English oshi ama ajaki jembinüba oshi ka kümadoktsü.

OLEMSABANG TETSÜ OSHI ANOGO

~ Dr. T. Temsunungsang, Shillong

February 21 anogo ya UNESCO-i “International Mother Language Day” ta jateta, alima ajunga nung iba ‘Tetsü Oshi Anogo’ amonger. Tia makai, kin aika nung pei oshi samadokba ajanga, nüburtem jenti atema iba anogo tetezü makai kümadokogo. Alima nung oshi ajak agi, merijang tenet tema lir ta ashir. The Atlas of World’s Languages in Danger (<http://www.unesco.org/languages-atlas/>) nung ashiba agi, oshi noklang ana (200) tema küm ishika tsüngda samaogo. Tang alima nung oshi taküm aliba rongnung, 201 nungbo joko par oshi jembir nisung 1 nungi 10 tsüngda dang lir, aser oshi 243 nung par oshi jembir nisung 10 nungi 50 tsüngda lir. Ashiko, item oshitem yaa putu ka tsüngda samatsü.

Alima nung yongsük noklang shilem nung 94-i oshi noklang pezü (400) shi jembir. Item oshi jembirtem yongsük aika asünung, tashi ita dang aotsü imlar. Tanüngba yongsük 6%-i oshi merijang pungu ser noklang pungu tema (5500+) jembir. Item oshi atema tebilemtsü tulu lir, kechiyong oshi ka nütsung kodang ishika dang südir, samatsü temela. Naga nunger, aser asenok Aora iba telok nung dena lir. Iba amala tensa ka nung, asenok Aortem, kija aser lokti balalai, pei oshi jenjang ajungkettsü atema kechi inyakdar?

Oshi (Language), sobaliba (Culture) aser shisaluyim (Education) tesendaktep ya kanga dang tongtipang lir. Anungji, oshi ka wazüka ayutsü atema, tamasa sobaliba wazüka ayutsüla aser sayutsüla. Otsüla Oboula mapang, sobaliba nung shisaluyim aser tesayubatem ajak yimdak, arju aser tsüki nung angazük. Tanübo, item rijutem samaa odaktsüba den pei sobaliba tangazükda makai kumogo. Saka, yim aser jila ajak nung iba melena school amendaka lir. Tensa aser mapang melenba ama, asen tesayuba yimya melena, pei oshi aser sobaliba indang shisaluyim ji school aser college nung agütsütsüla.

Shisaluyim tsütsülen, UNESCO indang tangatetba tongtipang kaji tanurtem ajak pei tetsü oshi nung tesayuba agütsütsübaaji lir. Aser iba anogo amonger ajanga, sorkar nung lenirtem, school aser college nung tesayurtem, tsüraburtem aser kibongtem dang iba tongtibang tangatetba ya agütsütsü meranger. Iba den külemi, pei tetsü oshi jenjang, lenmang balala nung ajungkettsü ajungshir.

Asen nüburtem tsüngda Ao oshi zülumen atema atsütep dang, kecha terenlok makai küm aika suia, samaa odaktsüogo. Saka, item tesübatemji tangazükba ka kümdaktsür, tejakleni aotsüla. Tanü Ao Senden anir, Ao Senden Literature Board (ASLB) ajanga mapa tajung jenti inyaka odagi, aser maneni nükla tulu yur inyaka aotsü ta imlar. Alima tesem aika nung joko pei oshi sayutsü aser angazüktsüba ji tongtipang onük ka kumogo. India nung pei oshiji subject ka ama sayütsüba dang masü saka “akok tashi” pei oshi agi class 1 nungi 5 tashi subject ajak sayutsü National Education Policy (NEP) 2020 nung shia lir. Iba policy nung lateta alibaji akoktsü makoktsü, aji asen nüburdak keta lir.

Nagaland nunga Ao Senden tetuyuba nung Mokochung district kübok sorkar aser nüja school ajak nung Ao subject sayudar, aser Dimapur/Kohima nunga school aika nung Ao sayur. Iba telemtetba ya kanga dang tapet kechiyong, kibong aika nung tanuri pei oshi mejembiba angutsü. Asen Aor nütsüng district ajak nung prokshia alinung, item district ajak nung Ao sayutsü atema lenmang bushia lapoktsüla. Iba ya kanga tongtipang, kechiba süra item district nung tangar kin den meyoektepa aliba mapang pei oshi amadoktsü ana nung dang lir. Nagaland nung dang masü saka India lima state balala nung asen Aor jenti lir. ICSE board nungbo Ao subject ya recognise süa alinung, tesayur dang ngutetra, Ao ji ICSE school nung agitsü akok. Saka CBSE nungbo iba lenmang ya lapoka mali. Ao Senden sorkar aser CBSE den tongtepratepa lenmang lapoktsü nungbo, bendanglima alir asen tanurtem atema tangazük tulu asütsü.

Asen Ao oshi meraketa amshitsü ajungshiba mapang ka nung, ASLB nüngja nung Engraji ojang ya asen oshi temeja agi melentsü mapang tongogo ta bilemer. ‘Literature’ melena ‘Kenozülü’, ‘Oshioben’ mesura ‘Oshipuin’ amshitsü akok. ‘Board’ melena ‘Lokmedem’ amshitsü akok. Oshi indang jembidang, ‘literature’ kisüng masü saka ‘language’ dena lir. Anungji, ASLB nüngja ya Ao agi meyipra, ‘literature’ aser ‘language’ anaprongla inoktsü junger.


January 2020 küm, 68 buba Ao Kaketshir Mungdang (AKM) lokti senden Khar yimtiba nung amongdang, Ao oshi wazüka aser sabua bentshitsu shisalemsabang ka ajanga tesayuba tajung agütsüba dang masü saka, Ao oshioben aser kaketkeno süngsashia aser wazüka ayutsü atema, küm ter (2020-29) tsüngda tapet mapa inyaktsü bangzüng renemba angudang, kanga pelar. Amanger, AKM lenirtemi item küm 10 tsüngda, tenüng agidang masü saka tapet nukjidong (short-term/long-term) yur inyaka aotsü. United Nations-i lemteta, 2019 kum “International Year of Indigenous Languages” alima ajunga nung mongogo. Saka, küm ka among yagi teperi masü ta ajiteta, United Nations-i 2022 nungi tenzüka 2032 tashi “International Decade of Indigenous Languages” amongtsü lemteta lir. Ya tanga masü saka, alima linük balala nung pei oshi jenjang aser tia metetdaktsütsü nukjidong nung inyaker. Iba bangzüng terenemba nung ashiba agi, oshi wazüka ayutsü, süngsashitsü, jenjang tajungba kati ajungketa tashi itdaktsütsüji kanga rongdak nüngdak ka lir. Iba den külemi, national aser international level nung tongtipang mera agitsüba kanga nüngdak ta ashir.

Kin aika nung pei oshi teküpoktiba tia nung aliba ajanga, rongsen jenti entoka mapa inyakteper. Pei oshi jembir ishiba ishiba akümba angudang, oshi mesüdaktsütsü asoshi, mapang arishia, tanur aser tain dang pei oshi sayutsü meranger. Iba mapa nung kija aser lokti balala aika longjemer inyakba angutsü. Saka, pei oshi küzmzütsü atema pei nüburtemi meinyakra, takok kodanga mangutsü. Oshipuin shisashir Hilaire Paul Valiquette-i yamai ashir, “Pei lokti, aser pei lokti kisüngi dang taküm oshi ka wazüka yutet. Lokti jagi iba khuret aser teinyaktsü tangar nem agütsüadokra, mesüra iba khuret ya lokti nungi nisung ishikati dang benra (school tesayurtem ama), iba oshiji asütsü. Oshi wazüka ayutsübaaji lokti tesadang kati dang masü, lokti rangbeni merangtsüla aser inyaktsüla”.

Aortem pei oshi, lokti nung, kidang aser kima nung, pei tsürabur den, adianu den aser medemer den sabua amshitsü aser wazüka ayutsü, iba Tetsü Oshi Anogo ayongzüker. Engraji aser Nagamese ji nai mejembiyonga, mesamatsü. Ao ji nai mejembira, yakta samatsü! Kechi mapa süaka, asalentong ya kanga tongtibang lir. Anungji, Aor lokti balala nung lenirtemi anir, nüburtem ajangzüksü asoshi, asadanga sentong balala ayongzüka takok ngua aotsü imla atar. Asenoki meinyakra, asenok dang akoksatsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

OLONG PAITEP # 5731



TIPIEN

2. Teburtemi tejak nung awaba - (8)
 6. T _ _ _ em - (3)
 8. Tzük ayudak - (3)
 9. Nüngdakba dang timba - (6)
 11. Züina ao - (4)
 12. Yangi tzü angur - (5)
 14. Tangar dang nungi tali - (4)
 16. Senyong masü - (6)
 17. Oadokdi - (3)
 18. Tzü tarok - (3)
 19. Yimtakir aikati iba ya ki den külemi yanglusemer - (8)

LANGTSÜNGLEN

1. Temejangdak - (6)
 3. Nisung ka mapa inyaksü nübo - (4)
 4. Azüntsü asoshi mejemba - (6)
 5. Tesangwa agütsüba - (5)
 7. Tila masü - (4)
 10. Tebenjem tetsür chanu - (4)
 11. Tekolak nung inok - (4)
 12. Tetsünga - (6)
 13. Tangar inyakba ka inyak - (6)
 14. Tim masü ta ashi - (5)
 15. Asalendong - (4)
 16. Tanüdagtsü - (4)

OLONG PAITEP # 5730 TELANGZÜBA

TIPIEN :

1. Telok, 4. Aluru, 6. Ozünga, 8. Emk,
 9. Kin, 10. Teti, 12. Süir, 13. Jen,
 14. Ola, 16. Talak, 17. Mazük.

LANGTSÜNGLEN :

1. Tenükjang, 2. Luden, 3. Kiochtsü,
 5. Lenti, 7. Tajangzük, 11. Teronem,
 12. Sempa, 13. Jahaz.

KOMA SÜLA TELANGZÜBA

Q. 1963 küm 1st December sülen Nagaland nung arua alirtem nem Nagaland nung dokan amentsü, taxi aser auto rickshaw anishitsü permit magütsü nunga koma süla?

1963 nungi Nagaland nung arua alirtem dokan amentsü, taxi aser auto rickshaw anitsü permit magütsü nungbo Naga lanur mapa mangurtem atema kangasa ajungtsü. Saka Naga nungeri permitji senyong tang meima ayoktsü tsübur ati. Kechiyong asen nisungi rongsen kanga penpur aser azümasen. Tarutsü indang mebilemer.

- SMS

Kanga ajungtsü, kechiyong asen nisunga lanur zünger mezünga mapa maka nangtaka lir. Saka tangattetsü kaji item mapatem inyaksü asoshi pei sasa shi aser azü ajunga agi agizüktetsüla. Aji masü nungbo ano meyiper asen nisung tsünga nungang meputep adoktsü aser tarutsü nung asen lanurtem tanga lima nung mapa mangutsü.

- SMS

TANÜBO NAI LANGZÜANG

Q. India indang mezünga toy fair (Indian Toy Fair) ya ____ tashi agitsü.

A. February 27 to March 2, 2021

B. February 25 to March 2, 2021

C. February 23 to March 2, 2021

D. February 21 to March 2, 2021

===== (Taruba adok nung onoki langzünsü)

YASHI ADOK TELANGZÜBA : Science and Technology

Happy Birthday

TENÜNG : ZUNGDEN A JAMIR

Tasoba anogo : 21 February, 2017

Talidak : Lengrijan, Dimapur

Jabaso Zungden küm 4 tashi Tsüngremi arishi aser taochi nung aniba asoshi Tsüngremer tenüng asanger. Maneni jabaso nem arishi aser anema aliba moajangma.

- Temeim Tsurabur aser kinungertem.



NAI-A YA METETTER MA?

INDIA NUNG NÜBURTEMI SAPUA ALIBA TWO-WHEELER

MODEL TEM: JANUARY 2021

- | | |
|----------------|----------|
| 1. Splendor | 2,25,382 |
| 2. HF Deluxe | 1,34,860 |
| 3. CB Shine | 1,16,222 |
| 4. Pulsar | 97,580 |
| 5. Passion | 43,162 |
| 6. Classic 350 | 40,872 |
| 7. Apache | 28,456 |
| 8. Platina | 27,131 |
| 9. Unicorn | 25,799 |
| 10. Glamour | 22,681 |



SUDOKU # 5773

	2			7	8	1			7	5	8	9	2	1	6	4	3
8			2		6	4	5		4	2	1	7	3	6	9	5	8
	6	1		3				2	3	6	9	4	5	8	7	1	2
		8		4	5	9		1	2	8	7	5	6	4	3	9	1
7		5	1		9	3		6	6	4	5	3	1	9	2	8	7
2	1					5	4	7	9	1	3	8	7	2	4	6	5
		4					9		5	9	2	6	8	3	1	7	4
9		2							1	7	4	2	9	5	8	3	6
3		6		9	2	7	1	8	8	3	6	1	4	7	5	2	9

TELANGZÜBA # 5772

OJANG LUTEP # 5319

GATANR :
 TEMIMT :
 IDAALNG :
 YARIMENÜ :
 IPE :
 TEMTIMA :
 ANALIDG :
 NGATAR :
 RITEYA :
 INAGÜ :

OJANG LUTEP TELANGZÜBA # 5318

LENDONG TIMTEM AJURUDANG SHISATSÜ ASER SHIAZÜ
 NUNG KISÜNG KÜMA KANGSHI

TAN HOPTA ATEMA - KOMA SÜLA ?

Q. Ao oshi renloktsü atema Aor kibongtem nung teyaritepertem tangar kin nungi masü Aotsür Aortem dang ayu nunga koma süla?

Olong 20 shi nung February 26, 2021 tashi nung iba telangzüba ya onok dangi (e-mail - tiryimiyim@gmail.com) :
 (SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzübatemji taruba Honibarnü adoktsütsü.



Bhopal, February 20, 2021: Centre sorkari totzü aser LPG nung jenjang atuba anema Honibarnü Bhopal nung Congress-i longkak aitba mapang Congress lenir Digvijaya Singh den party nung inyaktertemi New Market nung dokan kiburtem dang dokan shibangtsü ajungshiba noksa nung angur.

Aluyimba ozüing aser totzü jenjang atuba anema Congress-i longkak ait

Jaipur (Rajasthan), February 20 (Agencies): Honibarnü Congress party-i Rajasthan nung aliba district ajak nung Centre sorkari benokba aluyimba ozüing tasen asem aser tawa gari totzü jenjang maneni atuba anema longkak aitogo.

State yimtiba, Jaipur nunga state Transport Minister, Pratap Singh Khachariyawas aser Congress Chief Whip, Mahesh Joshi na leniba nung longkak aita liasü.

Congress lenirtemi tractors, ut aser shiti nung mener longkak aitba nung shilem agi aser party nung inyaktertemi Ato kilonser, Narendra Modi anema yimyim ayima liasü.

Longkak aitba sentong nungji

Chief Minister, Ashok Gehlot aser Congress state Tir, Govind Singh Dotasra natibo shilem magiteti liasü. Gehlot bo NITI Aayog governing council senden nung adenba agi longkak aitba sentong nungji shilem magittet aser Dotasra-a temang majungba agi iba sentong nungji shilem magiteti liasü.

Osangbenertem den jembidang minister, K h a c h a r i y a w a s - i , "Aluyimertemi longkak aitba mapang nung aluyimer aika asüba sülen Supreme Court-i item ozüing asem soita atatsü tuyu aser Centre sorkaribo item ozüing benokner. Sorkari petrol, diesel aser LPG cylinder nung jenjang atuba agi nüburtem

yirutsür," ta ashi.

Ano külen Congress party aija BJP state Tir, Satish Poonia-i Chief Minister dang, longkak aitba sentong nung ayongzüka agitsü melenbo nenoki nangzükba ama aluyimertem dang sentsüh ajak atoktsüla, ta ashi.

"Aluyimertem tenüing nung longkak aita jajatsü agibo CM-i nangzüka aliba ama aluyimertem dang sentsüh ajak atoktsüla. State nung election atema nüboyimba mapang nung Congress lenir Rahul Gandhi aser Chief Minister nati aluyimertem dang ibaji (sentsüh atoktsü) nangzüka liasü," ta Poonia-i twitter ajanga metetdaksü.

Gujarat kübok Jamnagar nung alima nung Zoo tulutiba yanglutsü

New Delhi, February 20 (Agencies): Reliance Industries-i sector aika nung ajemoka inyakba sülen maneni parnoki alima nung zoo tulutibaji Gujarat nung yanglutsü sentong lir.

Gujarat kübok Jamnagar nung zoo nungji shiruru aser ozü tapu balala aika ayutsü; India nung aliba shiruru dang masü saka alima tesem balala nung aliba shirurutem-a ayutsü sentong lir, ta osang ka ajanga metetdaksü.

Reliance Industries Limited (RIL) Chairman, Mukesh Ambani'er jabaso tanubosang,

Anant Ambani indang project ji (zoo) Jamnagar nung RIL indang refinery project anasa ali acre 280 nung yanglutsü.

Zoo dak alia state sorkar yaritsü atema rescue center ka amenoktsü aser iba zoo ji 2023 küm lapoktsü sentong lir, ta Reliance nung corporate affairs director, Parimal Nathwani-i osangbener nem metetdaksü.

Iba zoo dangji 'Greens Zoological Rescue & Rehabilitation Kingdom' ajatsü.

Iba zoo nungji alima tesem balala nungi bener aruba ozü aser

shirurutem ayutsü aser section balala alitsü; item rongnung Frog House, Dragon's Land, Insectarium, Land of Rodent, Aquatic Kingdom, Forest of India, Marshes of West Coast, Indian Desert aser Exotic Island densema lir.

Zoo nungjisa African lion, cheetah, jaguar, Indian wolf, Asiatic lion, pygmy hippo, orangutan, lemur, fishing cat, sloth bear, Bengal tiger, Malayan tapir, gorilla, zebra, giraffe, African elephant aser Komodo dragon densema ayutsü.



Visakhapatnam, February 20, 2021: Centre sorkari Visakhapatnam nung aliba Vizag steel plant nija nem agütsüba atema longkak aittsü jelia YSR Congress MP, Venumbaka Vijayasai Reddy-i Mahatma Gandhi kürakyanglu nung narozük azüktsüba noksa nung angur.

Mehbooba Mufti-i Centre dang Pakistan den ken o jembitsü mepishir

Srinagar, February 20 (Agencies): Hokolbarnü Jammu & Kashmir nung tatalokba ana nung kiralongrartemi police asem kasetba sülen anogo ka lir Honibarnü PDP Tir, Mehbooba Mufti-i Centre sorkar dang Pakistan den ken o jembitsüla aser Jammu & Kashmir nung rara anentsü atema nüburtem den-a jembitsüla, ta metetdaksü.

Honibarnü PDP Tiri Kashmir nung Anantnag district kübok Logripora Aishmuqam area-i oa J&K Police Constable, asür Suhail Ahmad'er kibong semdanga mangyim lemsatapa liasü.

Hokolbarnü Srinagar kübok Baghat area nung kiralongrar kati Suhail Ahmad den Constable Mohammed Yusuf na khaseta liasü.

Constable Suhail tama asü aser Constable Mohammed Yusuf bo operation agiba takdangi anir aiba mapang nung ang asü.

Ano Hokolbarnüsa tanga tatalokba ka nung Budgam district nung kiralongrartem den raradang police ka asü. Kasa rara nungji kiralongrartema asem asü.

Honibarnü asür kibong

semdangba sülen osangbenertem den jembidang Mehbooba-i Centre sorkar dang Pakistan den ken o jembitsüla aser Jammu & Kashmir nüburtem den-a jembitsüla; J&K nüburtem, police tem aser lanurtem jenti asüba kodang anentsü, ta sorkari shisadangtsü nüngdak, ta metetdaksü.

"Iba onük (Kashmir onük) ya tongtibang onük tuluka lir aser Jammu & Kashmir nung azü tokshi anentsü aser yangi aliba nüburtem tesünap nung alitsü atema iba onük ya bentettsüla," ta laisa metetdaksü.

Asür, Ahmad dak sendakba nung lai, "Pai tanur ana toktsür süogo. Pa arrshi küm 4 asüdag tebu-a tepseta liasü. Parnoki (tanurtem) kechi inyaktsü?" ta asüingdag.

Taoba mapang J&K chief minister Mehbooba-isa, Union territory nung rara anentsü atema ken o jembitsüla, ta ashi.

"Azü tokshiba anentsü atema BJP sorkari shisadangba sülen ken o jembitsüla. Onok lepertem tasü mang agi süngadokogo," ta lai ashi.

Terenlok atema Centre aser states-i longjemer inyaktsüla: PM Modi



New Delhi, February 20, 2021: Honibarnü New Delhi nung video conferencing ajanga 6buba NITI Aayog Governing Council senden nung Ato kilonser, Narendra Modi-i jembiba noksa nung angur.

New Delhi, Tsüklai/February 20 (Agencies): Honibarnü New Delhi nung video conferencing ajanga NITI Aayog Governing Council 6buba senden nung jembidang Ato kilonser, Narendra Modi-i, sorkar indang Aatmanirbhar Bharat programme nung shilem agitsü atema nija sector nem maongka agütsütsüla, ta ashi.

Paisa, ozüing tesashitem agentsüla aser India nung shishilembaba maparen inyaktsü atema inyakyim tezübaba kümdaktsütsüla, iba denji külemi linük rongsenkettsüing tashi aittsü atema Centre aser state temi longjemer inyaktsüla, ta metetdaksü.

"Linük terenlok atema Centre aser state temi longjemer inyaktsüla. Rongsenkettsüing tsütsü terenlok alitsü atema sorkari nija sector akhümtsübuttsüla aser parnok nem maongka agütsütsüla," ta Ato kilonseri metetdaksü.

Union Budget 2021-22 ajanga linük tejakleni onüba aser

terenlok lenmang nung tekaraba jajanüba temaitsü sayur, ta pai ashi.

Sorkari benokba mapatong balala ajanga linük yangerba nung shilem agitsü atema nisung ajak nem maongka agütsütsü, ta pai ashi.

Aluyimba sector dak sendakba nung pai, nisungi achiba totzütem aika linük nung adokdaksütsüla aser bendanglen nungi totzü alizükba ajemtsüla, ta ashi.

Ato kilonserisa nüburtem nem tetuyuba agütsüba khuret pungbatsütsüla aser technology ainba mapang nung item ozüing ajema akümtsü atema state temi committee tentettsüla, ta ashi.

Niti Aayog governing council senden ya mapang shia amener aser tang mezüing council nung Ladakh, Jammu & Kashmir UTs ama aden.

Niti Aayog governing council nung züngsemtemji chief minister ajak, UTs nung lieutenant governors, Union minister aika aser sorkar tongti ketdangsertem lir.



Afghan security personnel temi Honibarnü Kabul nung bomb pokdaksüba tesem ka nungi gari teraksa ka aginba noksa nung angur. Iba lendong nung nisung aika yirutsüba den tasba dena ajangshiogo, ta Afghan ketdangsertemi ashi.

AstraZeneca-i Japan nung Covid-19 vaccine yanglutsü

Tokyo, Tsüklai/February 20 (Agencies): AstraZeneca company-i, Japan nung nisung million 40 peritsü atema coronavirus vaccine yanglutsü, ta company indang Japanese department executive director-i ashi.

Company ketdangseri NHK broadcaster dang ashiba agi, linük nung nisung million 60 nem vaccine agütsütsü atema AstraZeneca-i Japan den tenangzüktepba ka yangluogo.

Nisung million 40 atema vaccine ya Hyogo prefecture nung JCR Pharmaceuticals company indang facilities nung yanglutsü.

Japan nung vaccine agütsüba sentong February 17 nü tenzükogo. Japan nung coronavirus anema Pfizer indang vaccine dang agitsü temelaba agüja lir. AstraZeneca-i, Japan nung parnok züngoksemsü atema February 17 nü kuli kakettem agütsüogo.

World Health Organization-i March 11 nü Covid-19 tashidak ya pandemic ka ta sangdong. Tanü tashi nung coronavirus tashidak agi alima ajunga nung nisung million 110.68 dak kongshiogo aser nisung million 2.45 süogo, ta Johns Hopkins University-i metetdaksü.

Japan nung tang tashi nung nisung 422,000 dak tema iba tashidak agi kongshiogo aser nisung 7,300 dak tema süogo.

Argentine Health Minister mapa nungi anen

Buenos Aires, Tsükali/February 20 (Agencies): Argentina tir Alberto Fernandez-i health minister dang mapa nungi anentsü atema asüngdangogo. Minister-i nüngtugu osangbener ka nem vaccine agütsüba sülen pa mapa nungi anentsü atema asüngdang, ta sorkar ketdangsür kati Hokolbarnü ashi.

Tir-i pa indang chief of staff dang health minister Gins Gonzalez Garca, shiba governments COVID-19 strategy in charge lir, pa mapang nungi anents atema asüngdangtsü tuyua liasü, ta ketdangseri ashi. Gonzalez Garca melena health minister ama shiba shim iba indang pai osang magütsü.

Gonzalez Garcia-i pa dang mapa nungi anentsü atema asüngdangba indang yimja nung

jembia mali saka ketdangser-i ashiba agi pa sorkar nung shilem makai kümogo.

Osang bener Horacio Verbitsky, shiba indang otsü aser column website ka aser radio nung sangdonga liasü pai minister dangi call süa vaccine meshi aser Gonzalez Garca-i pa Health Ministry-i jaoka Brehostibarnü Sputnik V vaccine ka agi ta ashiba sülen mepetmesü adok.

Ni vaccine agitsü mulungtet aser iba sülen kolen nungi angutsü ta bushi tenzük. Ni kü medemer tejen Gonzalez Garca, shiba ni minister makümdang nungi meteta lir, pa dangi call asü, ta Verbitsky-i local radio station ka dang ashi. Ni ministry-i ao kong vaccine agütsürtem team ka liasü, ta paisa shisem.

Iba amala ken o ya Argentina nung tang tasen

masü; tawa yimden yimsüsürtem den sendaktepa aliba mayor, legislator, activist aser nüburtem nem vaccine agütsüba osang aika adokogo. Doctors, health personnel aser tantsür tamburtem nem mezüng vaccine agütsütsü atema tetuyuba agütsür liaka item nisungtem nem vaccine agütsüogo.

Argentina nung vaccine agütsüba inyakyim kanga menor tenzükba atema Fernandez-i aniba sorkar kanga mejungi aitsüogo. Tang tashi nung parnoki Sputnik V aser AstraZeneca vaccine dose million 1.5 shi agizükogo, koba nütsünyongsük million 40 nem agütsütsü teperi masü.

Argentina nung nisung million 2 shi dak coronavirus tashidak menaogo aser iba tashidak agi tang tashi nung nisung 50,857 süogo.



Moscow, Russia nung opposition lenir Alexei Navalny Babuskinsky District Court nung nokdakba nokda nung angur. Moscow City Court nung Navalny ken o ana atema nokdakogo. Pa tepuokdaki yokba atema taitok agütsütsü mepeshiba ken o ka aser tenüng menütsüba ken o nung pa aija aliba atema obendang angadangtsü nokdak.

France-i warships ana South China Sea-i yokogo

Paris, Tsüklai/February 20 (Agencies): South China Sea nung parnokia shilem agiba metetdaksütsü atema Feance-i mangatettep aliba tzyüim ya anaben tashi süitsü asoshi sentong yangluogo.

South China Morning Post sangdong ka ajanga, French Navy-i ashiba agi, amphibious assault ship Tonnere aser frigate Surcouf ta rong ana Brehostibarnü Toulon toktsür apusaoogo aser ita asem Pacific tzyüim nung senzütsü, ta metetdaksü.

Website Naval News sangdong ka ajanga, rong ana ya South China Sea anaben adentsü aser Japan aser US military den May ita exercise ka nung shilem agitsü ta ashi.

Tonnerre rong commanding officer Capt Arnaud Tranchant-i, Naval News dang ashiba agi, French navy-i, US, Japan, India aser Australia den tesendaktep akangshitsü atema inyaksü.

Parnok Taiwan Strait nung anenzüksü sentong lir asü ta asüngdangba mapang pai, iba

tesem nung ano koba lenmang agitsü iba insang sentong meyanglu lir ta langzü.

2015 aser 2017 kuma French navy rongtemi South China Sea adena ogo saka ken o asadangsertemi, tang iba jenjang agiba ajanga Indo Pacific region nung France shilem ajungketshiba temaitsü sayur, ta ashi.

US tir Joe Biden-i, China nongshitsü atema ayongzükbba sülen taoba hopta France-i South China Sea-i nuclear attack submarine ka yokogo.

Hopta tetenzüklen France Defense Minister Florence Parly-i Twitter ajanga, koba tzyüim nung senzüdir senzüaka international özüng dak alaka tanga özüng kecha mali ta nenshitsü atema parnoki nuclear attack submarine Emeraude den support ship Seine yokba metetdaksü.

Europe nung linüktem rongnung United Kingdom aser Germany natia iba tesemi rara dang amshiba rongtem yoktsü imlar, koba China-i tzyüim

Indonesian yimtiba tzü agi metsünpang



Jakarta, Indonesia nung tzümetsüng aruba sülen nüburtem tzuwadanga aoba noksa nung angur. Tzüglu kanga sashia aruba aser kilentsü junga yanglua maliba ajanga greater Jakarta kübok tesem kar nung mapang shia tzümetsüng agi kongshir.

Jakarta, Tsüklai/February 20 (Agencies):Indonesia yimtiba nung tesem aika tzü agi metsünpangba sülen Honibarnü nüburtem aika pei ki toktsür jenshiaogo. Kasa mapang nung linük meteorology agency-i taruba hopta tashi tensa tesüngjemba makümtsü ta metetdaksüogo.

Jakarta yimti anüdok aser anüolentip nungi nisung 1,380 shi aninogo. Tesem kar nungbo tzü meter 1.8 dak tema metsünpangba liasü, ta Jakarta indang disaster mitigation agency tekolakba Sabdo Kurnianto-i ashiba den tang tashi nung nisung taküm samaba osangbo kecha mali ta shisem.

Nüburtemi, social media nung iba tesem nung alirtem lishitzü teku tashi atur aliba nung jajayonga aoba noksa aser gari metsünger aliba noksa den teküzmükertemi tantsü tamburtem rubber agi yangluba rong nung teküzmükdak bushia anir aoba noksa lemsatepogo.

"Tzümetsüng agi kiyong 200 dak kongshiba data ajanga

sayuogo," ta Jakarta Angh Anies Baswedan-i Honibarnü ashi. Paisa, yimti nung evacuation centre 34 dak tema amenokogo, ta ashi.

"Tzünglu aru anenogo, saka tanga tesem nung aruba tzü ajanga Jakarta kongshir. Imlar iba ajanga yimti teyongtsübo mekongshitsü aser tzü asemshia aoba sülen nüburtem pei mapa tenzüktettsü," ta pai ashi.

Southeast Asia nung linüktem rongnung COVID-19 tashidak agi Indonesia nung nisung timtiba asüba den rongsenketsüng nung kanga mejungi kongshir aliba mapang tang tzümetsü lendong agi kongshiogo.

Indonesia meteorology agency (BMKG)-i, taruba anogotem nung nütsünyongsük aika aliba linük yimtiba aser temeket nung tzünglu tesashitiba arutsü ta shiogo. Tzünglu den mepung tesashi, tsüngi tsüngmok taruba hopta tepeyong arutsü imlar, ta BMKG-i ashi.

India nung Honda CB350RS sayaogo



New Delhi, Tsüklai/February 20, 2021 (Agencies): Honda Motorcycle and Scooter India (HMSI)-i India nung Honda CB350RS Motorcycle tasen sayaba sangdongogo. Iba motorcycle jenjang sen lakh 1.96 (ex-showroom) alitsü.

Honda CB350RS ya BigWing range indang dealership tem ajanga India ajunga nung ayoktsü aser CB350RS motorcycle ya Honda H'ness CB350, Honda Africa Twin Adventure Sports aser Honda CBR1000RR-R nung adener, koba Honda BigWing ajanga ayoker.

Honda CB350RS ya Honda H'ness CB350 sabang nung amendaker yanglu, koba taoba küm sayaa liasü, ajisüaka

CB350RS nung temelenshi kar angutsü.

Honda motorcycle tasenba ya blacked-out design theme alitsü, koba H'ness CB350 nung anguba chrome-finish dang nungi balaka lir. Honda CB350RS nung side panels, front aser rear fender, headlamp encasing, front suspension, rear suspension, horn dena lir aser item shilem sentsü tanak alitsü. Ajisüaka, engine nung chrome finish angutsü aser H'ness CB350 den kasa alitsü. Ano külen, Motorcycle exhaust nung chrome tajemba lir.

Motorcycle tasenba nung, LED tail lamp design, LED indicators, engine kübok skid plate, front fork gators aser seat design tasen angutsü. Item dak alaka, motorcycle tejaklen (100/

90) aser tesülen (150/70) tyre inoka yanglutsüogo aser Ibaji ajanga scrambler ama Motorcycle akhüm ketdaksür.

Tanga shilem nung design temelenshi dak alaka, CB350RS nung rear-set footpeg tasen inoktsüogo. Ajisüaka, CB350 ama motorcycle chassis, gearbox den slip & assist clutch, 350cc, air-cooled, fuel-injected, single-cylinder engine angutsü.

Iba engine ajanga 15.5 kW power aser 30 Nm torque agütsür. Motorcycle anaprongla nung semi-digital instrument cluster kasa angutsü, koba ajanga gear position indicator, distance to empty aser real-time fuel consumption metetdaksür.

Iba den bendenloksema, Honda CB350RS nung Honda Selectable Torque Control (HSTC) inoktsüogo. HSTC ya Honda inday traction control system ka ama lir, koba dual-channel ABS ama switchable asütsü.

Honda-i ashiba agi, iba Motorcycle mekaa ayutsü atema mapang lapoktsüogo aser March ita nungi tenzüka mekaa alirtem nem iba motorcycle agütsütsü imlar. CB350RS ya sentsü ana - Radiant Red Metallic aser Black den Pearl Sports Yellow nung angutsü.

'The Flash' nung Sasha Calle-i Supergirl shilem agitsü

New York, Tsüklai/February 20, 2021 (Agencies): Daytime Emmy-nominee actress Sasha Calle ya DC Universe indang Supergirl tasenba ama aniokogo aser The Flash film nung lai shilem agitsü.

Ace director Andy Muschietti, shibai taruba film direct asütsü, pai Instagram sabang ajanga iba osang jangatsüogo.

Variety sangdong ka ajanga angazükba agi, casting atema Calle mejaokdang, Muschietti-i actor 400 dak tema audition agiogo. Latina tsür rongnung Calle-i mezüng Supergirl shilem

agir alitsü. DC canon nung actor aikati Supergirl shilem agidanga lir. 1984 Warner Bros. movie nungi tenzüka Helen Slater-i mezüng Supergirl shilem agiogo. Ano külen, CW series Smallville nung Laura Vandervoort aser tawa sayuba Warner Bros. TV series - Smallville nunga Melissa Benoist-i shilem agiba nguogo.

The Flash ya Calle indang mezüng film alitsü. The Young and the Restless atema lai Daytime Emmy nomination angu. Iba soap opera nung lai Lola Rosales ama shilem agir.

Justice League aser Batman

v. Superman: Dawn of Justice nung Flash adokba sülen, iba film ya Flash character indang mezüng standalone project ka asütsü. DC indang film anaprongla nung Ezra Miller-i Flash - Barry Allen ama shilem agiba nguogo.

Christina Hodson, shibai movie talisa Transformers spinoff Bumblebee aser Birds of Prey atema otsü zülutsüogo, lai Flash atema script renemogo. Muschietti-i 'It' aser iba sequel It: Chapter Two direct süogo.

The Flash film ya November 4, 2022 nung sayatsü terenemba lir.

Alan Walker aser Salem Ilese na longjemer

New York, Tsüklai/February 20, 2021 (Agencies): 'Fake a Smile' ta nüngja agütsüba single tasen ka atema Alan Walker-i Salem Ilese den longjemogo.

BRIT Award nominee aser diamond-selling DJ Alan Walker-i pa indang track tasen - 'Fake a Smile' atema 'Mad at Disney' kentenla Salem den longjemer.

Walker aser Ilese na indang ken ya hypnotic track ka lir aser iba track yagi producer Alan indang track yangluba yimya balaka sayur.

"Fake A Smile atema mapang tatsüka inyaka aruogo. Ni iba ken tetezü kanga meimer aser Salem Ilese-i la ola tajung amshia iba ken tanganütsüka tentsüogo. La ya artist tajung ka lir aser ajaki lai atenba ken ya temulung agüja angatsüla ta nibo bilemer," ta Walker-i ashi.

"Alan Walker! maparen nung külemi inyaksü maongka anguba atema pelar aser iba ya



ni asoshi konang ama lir. Ni amanger, iba ken ya ajaki jangratema angatsü," ta Ilese-i shisem.

Iba ken den külemi, Walker-isa 'Fake a Smile' merchandise collection ka sayatsü terenemba lir. Walker indang merchandise collection ya Gaming tsütsü company tetsüti ASUS den longjemba shilem ka ama alitsü.

Tanü tashi Social media sabang nung Alan Walker follower million 120 dak tema

lir aser pa tenüng nung billion 50 audio aser video stream süogo. Ibaji ajanga, YouTube sabang nung follower timtiba aser Spotify nung 20buba alitsü.

Taoba mapang nunga, producer Walker-i artist talisa Ava Max, Noah Cyrus aser ASAP Rocky nung den longemogo. Ano külen, Sia, Coldplay, Kygo, Bruno Mars aser Julia Michaels atema remix ken tem pai yanglutsüogo.

PELABA LEMSATEPER



Aso
1935

Asü
11-2-2021

Onoki teti meima aliba ojala **Tekawala Walling** (Khar) shiranga alidang aser ozü asüku mapang kija, kibong, kiyonger yimer yimsanger, Arogo aser tembartem shirnokisa aria bilema nübo, rongsen aser sarasadem nung nungita yariogo nenok ajak dang kangasa pelaba iba osang kakat ajanga lemsateper.

Ozü-i nenok dangi tsüngdong arua tepela meshiteter saka ozü mulung nung teti lir, aser nenok mapa tajung kodanga mamatsü.

Tulusang Tsüngremi nenok nem lepa moajangni ta ozü tamang sarasadem.

Temeim kinungbo, chirnurtem, semchirtem & kinungertem.

MULUNGNEN O

Temeim asür T.Yongkonglemba Pongen shiranga alidang aser pa iba lima nungi pilar onok mangyim jashi tia nung alidang, shirnokisa onok dang meima maparen tapu balala nung teyari agütsüogo, onok kinungertemi nenok ajak dang kanga pelaba metetdaksür.

Ano, talisa onoki item dang ya pelaba shisemer :

1. Hayat Hospital, Guwahati aser Eden Medical Centre, Dimapur nung doctors aser nurse-tem
2. Dimapur Ao Baptist Arogo
3. Dibua Baptist Arogo
4. Dibua Village Council
5. Dimapur Dibua Union
6. Dimapur Yajang Union
7. Dimapur Midland Council
8. Dimapur Impur Chanu Telongjem
9. The Rotary Club, Dimapur
10. Tenapang Sungküm Society, Dimapur
11. Dr.Longrineken, Advisor, National Highways & Treasures & Accounts.

Onoki kija kibong shia tenüngteta pelaba meshitetba atema sasar, ajisüaka nenok ajaki onok mulungjang taroktiba nungi adokba iba mulungnen o ya agizükangma aser Tsüngremi nenok ajak moajangma.

- Temeim kinungtsü & Kinungertem.



Piles Anepaluba - Kabiraj dang alakteta pelaba metetdaksür. Piles, Fistullah, Gastric, Sinus aser Tonsil-Athjma agi ni kangshia liasü aser Rectum nungi azü alu dang mapang talangka item timtem nungi junga taneptsü mang. Ajisüaka, tang **Kabiraj H. Umar Chesam contact no. 7627998690 Address: Near Nagaland Gate, Lahorijan K/A Assam,** tetuyuba nung anidaka surgery kecha magii (non-surgical) anepalur anogo ishika tsüngda ni taneptsü ngua liasü aser iba sülen tanü tashi kü temang nung timtem kecha mali. **Time: 9 AM - 5 PM**
Yours sincerely - Raju Raj, Add: Burma Camp, Dimapur



LISEM (SAND) STOCKAGE

KANIAKHAT PALU (LISEM) TZÜRANGKONG (CHUNGTIAYIMSEN AREA) NUNG STOCK ASÜBA TALITSÜ ANGÜTSÜ.
MOHAL KIBUR CONTACT: 7085231386



Dimapur, Tsüklai/February 20, 2021: 1971 India-Pakistan tongbangrara nung India-i takok ngur küm 50 ajungba nüngtem nung, Honibarnü HQ IGAR (North) kübok Dimapur Battalion indang Assam Rifles-i sepa nung adentsü tejangrar lanurtem atema documentary show ka ayonga agiba yangi angur.

Osaka-i Australian Open kokogo



Melbourne, Tsüklai/February 20, 2021 (Agencies): Honibarnü, Australian Open tetsür kija final asaya nung, Japan

tsür Naomi Osaka-i set ana atonga Jennifer Brady madak takok ngua iba asayamung title anabenbuba kokogo.

Rod Laver Arena nung terepranger meyisa meyi matsüngdang Osaka-i 6-4, 6-3 agi Brady akok. Iba asaya mezüing set nung Naomi tera timtema asaya liasü saka tanabuba set nung lai tasa tajungba amshia asaya koktet.

Seed tasembuba Osaka-i 2018 aser 2020 US Opens den Melbourne nung 2019 title akokba sülen, taküm lai Grand Slam pezübuba akoker alitsü.

"Tesüiba ita ana tejakdang US Open Semi-final nung ana asayaogo aser na ya asayar tajung ka akümtsü ta ni ajak dang shiogo aser ni bilemba ama

shitak ataloker. Tesüiba ita ishika tejakdang nungi nai junga shilem agia aruba angudang ni pelar," ta sempet agütsüba mapang Osaka-i Brady dang ashi.

Arishi küm 23 tain Osaka, shiba Monica Seles aser Roger Federer sülen tongtibang asayamung pezü takok angur rongnung asayar tasembuba kümogo, la tang World Ranking nung tanabuba jenjangi atutsü.

Osaka, shiba tetsür athlete rongnung taa timtiba angur athlete ka ama züingshir, iba asayamung takok marok mangudang, pezübuba round nung lai match point ana ngua Garbine Muguruza tsükdaktsü. Tetsür kija Semi-final nunga Osaka-i 6-3, 6-4 agi Serena Williams kokogo.

1buba Champions Trophy T-20: BSCT aser Diphupar CC na semi-final-i iogo

Dimapur, Tsüklai/February 20, 2021 (TYO): Honibarnü, 1st Champions Trophy T-20 Cricket Tournament quarter-final nung BSCT aser Diphupar CC nati pei pei tata asaya takok ngur semi-final-i iogo.

Mezüing asaya nung, BSCT-i wicket 6 agi Dhansari CC tsükdaktsü. Dhansari CC-i over 16.5 nung run 89 target yutsü aser parnok ajak out süadok. BSCT-i ayong ayonga dang over 6.1 nung alizüing tongtet aser parnoka wicket 4 out asü. Iba asaya nung Gopi-i wicket 4 agiba atema pa nem man of the match award agütsü.

Kasa anogo, quarter-final

tatembuba nung Diphupar CC-i wicket 8 agi Whiskers CC tsükdaktsü. Toss koka, Whiskers CC-i batting shim aser over 14.1 nung parnoki run 106 target yutsü. Tanabuba innings nung Diphupar CC-i over 12 nung run 106 yanglutet aser wicket 2 out asü. Iba asaya nung Bidemo-i run 57 aser wicket 2 agiba atemaw pai man of the match award angu.

*** FEBRUARY 23, 2021**

NÜ SEMI-FINAL ASAYA:
1. Flying Rabbits vs BSCT @ 8AM
2. Police Baptist Church Chumukedima vs Diphupar CC @ 11AM

PSL 6 tenzüktsü aliba tejakdang asayar ka dak COVID-19 putet

Karachi, Tsüklai/February 20, 2021 (Agencies): 6buba Pakistan Super League, koba Honibar nungi tenzükogo, iba asayamung tenzüktsü aliba tejakdang, asayar ka dak Covid-19 tashidak tejangja putet, ta Pakistan Cricket Board sangdong ka ajanga metetdaktsü.

"Tanga franchise team nung asayar ka, shiba Covid-19 tashidak temaitsü aliba sayu aser tangar dang nungi balaka anepalua liasü, pa dak iba coronavirus tashidak aliba tejangja putetogo," ta PCB-i ashi. "Anogo 10 atema pa quarantine asütsü aser re-entry protocol atema temsüa akümtsüsa Covid-19 puteta alisang ya anaben tashi negative tendangtetsla," ta kasa sangdong nung shia lir.

Ano tanga team nungi asayar ka aser ketdangsür ka bio-secure bubble temzüing raksaba atema anogo asem quarantine nung amungtsü tetuyuba agütsüogo, ta PCB-i ashi.

Hokolbarnü, bubble adena

tukur tenati nisung ka den ajurutepe, ta kasa sangdong nung shia lir.

Anogo asem tashi quarantine nung amungba mapang, tena indang Covid-19 test anaben tashi negative asütsüla. Iba sülen ang tena tanaben bio-secure bubble telungi aitsü akok.

"Shilem agir franchise rongnung franchise ka indang züingsem anati mekümdangi aser bio-secure bubble temzüing alema bubble telung nung malir ka den ajurutepe ozüing raksaba atema PCB kanga mepelar," ta sangdong ajanga metetdaktsü.

"Taoba mapang nenshia metetdaktsüba ama, HBL Pakistan Super League 6 nung sendaktepa alir ajak kümzüka yutsütsü ya PCB aser asayamung atema teinyaktsü tongtibangtiba. Asayar, teyariteper, match ketdangsertem aser asayartem adianu/kinunger ajak dang PCB Covid-19 protocols nung tashi anga anidaktsü asoshi lephsia metetdaktsür," ta PCB-i shisem.

India tebur hockey team-i Europe tour nung shilem agitsü

New Delhi, Tsüklai/February 20, 2021 (Agencies): Olympics atema renemshitsü tebilemba nung, tan ita India tebur hockey team-i Germany aser Belgium tour nung shilem agitsü asalentong yangludat. Alima ajunga asüingba COVID-19 wara ajanga taoba küm March ita nungi saisapongtem anenja arur tang India tebur hockey team-i mezüing international asayamung nung shilem agir alitsü.

Deobarnü, asayar 22 aser support staff trok telok ka Krefeld, Germany ayamesoa aotsü. February 28, 2021 aser March 2, 2021 nü India team-i Germany den asayatsü.

Iba asaya ana temer sülen, March 6 aser March 8, 2021 nü Antwerp, Belgium nung India team aser Great Britain na asayatsü.

Goalkeeper aser captain PR Sreejesh lenisüba kübok India team-i tour ana nung shilem agitsü. Kasa mapang, anogo 17 tour atema drag-flicker Harmanpreet Singh vice captain ama asayatsü.

Taoba küm, February ita India tebur hockey team-i international tetoktepba nung tesüsa shilem agiogo, kong Bhubaneswar kübok FIH Pro League nung parnoki Australia den asayaogo.

Iba asayamung (FIH Pro League) nung India team-i Australia den junga asayaba ajanga, FIH world ranking nung India team jenjang pezübuba tongtet.

Taküm January ita asayartem training tenzükshiba mapang nungi Bengaluru kübok Sports Authority of India (SAI) indang campus nung India hockey team munga arudar.

January nungsa, Argentina tour nung India tetsür hockey team shilem agiba mapang, parnok international hockey

asayamung takok ngua tenzükshigo. Kasa mapang, tour shilem ama India tetsür junior hockey team Chile-i ogo. Taküm küm tongtibang asayamung talisa Olympic Games aser Junior World Cup asayamung asayatsü aliba tejakdang Chile tour nung India tetsür junior team-i shilem agiogo.

"Europe-i oa asayatsü maongka anguba atema pelar aser ita 12 sülen onoki mezüing International asayamung tetoktepba nung shilem agitsü asoshi terenemba lir," ta India tebur team chief coach Graham Reid-i ashi.

"Team tajung ana - Germany aser Great Britain den asayaba ajanga toktepa asayatsü maongka angutsü aser Pro League den Olympic Games atema tajungba renemshitsü lenmang lapoktsür. Top 10 jenjang nung alir team mashi ka den asayatetba ya teti nunga team atema tajangshiba tulu lir," ta Reid-i shisem.

Taküm tongtibang asayamung tenzüktsü aliba tejakdang team atema iba tour achayangba asoshi Reid-i Hockey India aser SAI dang pelaba metetdaktsüogo.

"Küm ka tashi masayateti arur mezüing tour ka nung asayatsü asoshi onok yongyar. Pro League, koba Olympic Games tejakdang asayamung tongtibang ka lir, iba League atema Germany aser Great Britain na den asayaba ajanga asaya tsütsü onok kanga nungittsü. Europe nung tangba mongpu ya kanga temekong alitsü, saka tour tenzüktsü atema hopta ka dang anünga lir. Onoki iba asayamung nung shilem agitsü terenemba lir aser toktepa asayatsü asoshi yongyar," ta Reid-i ashi.

Hockey India aser asayamung ayonger national

association anati team tem training aser tetoktepba atema bio-bubble renemtsütsü asalentong yangludat.

India team hotel ka nung anenzüktsü, kong asayartem atema takdang balala renemja lir. Iba den külemi, chiyongtsü, team senden aser session atema takdang tem renema lir.

Hockey India sangdong ka ajanga angazükba agi, iba Tour atema ayamesoa aotsü ghonda 48 lia India contingent ajunga Covid-19 RT-PCR test agitsü.

Germany tongli asayartem quarantine nung amungtsü ozüing maliyongja, India, Germany aser Belgium Sorkar tetuyuba nung anidaka team-i tekümdangtsü mera ajak nung anidaktsüla, ta kasa sangdong nung shia lir.

Züingsem 22 India squad nung skipper Manpreet Singh, Rupinderpal Singh, Varun Kumar aser SV Sunil nunger madener.

Ano külen, Manpreet ya nija nüngdak kar aliba ajanga iba asayamung nung shilem magitsü lemtet; kasa mapang Rupinder aser Varun na yirur aliba ajanga iba asayamung nung shilem magiteter.

****India Tebur Hockey Squad:**

Goalkeepers: PR Sreejesh (captain), Krishan Bahadur Pathak

Defenders: Amit Rohidas, Dipsan Tirkey, Gurinder Singh, Harmanpreet Singh (vice-captain), Surender Kumar, Jarmanpreet Singh, Birendra Lakra

Midfielders: Chinglensana Singh, Nilakanta Sharma, Hardik Singh, Vivek Sagar Prasad, Rajkumar Pal, Simranjeet Singh, Shamsher Singh, Akashdeep Singh.

Forwards: Gurjant Singh, Ramandeep Singh, Dilpreet Singh, Mandeep Singh, Lalit Kumar Upadhyay

Vijay Hazare Trophy: Ishan teyari ajanga Jharkhand-i M. Pradesh kokogo

Indore, Tsüklai/February 20, 2021 (Agencies): Honibarnü, Vijay Hazare Trophy indang Elite Group B asaya nung Jharkhand-i Madhya Pradesh kokogo.

Iba asaya nung Jharkhand skipper Ishan Kishan-i batting tsütsü shilem tajung agia pai ball 94 nungi run 173 yanglutet. Iba mapang Ishan-i 'six' 11 zükloktsü.

Team ana tsüingda asayaba mapang, Ishan-i ball 74 nung six' 5 aser four' 12 densema century (run 102) yanglutet. Iba sülen ball 20 nung Ishan-isa run 71 yanglua, over 26 nung Jharkhand team run 200 alema

atu. Over 20 tsüingda Jharkhand pur asayar ana tashi out süadok, saka Ishan-i telangzüba tajung agüja Madhya Pradesh bowler tem dang taochi mesayui maongka anguba ball ajak züklokja iba alizüing tongtet. Over 28buba nung Gaurav Yadav-i Ishan out sütsür sülen Parth Sahani-i aniba team anisüingzük angu, saka Jharkhand-i run 240 yanglutet.

March 8 aser 9, 2011 nü quarter-final asayatsü. Iba sülen March 11, 2021 nü Semi-final asayatsü. Takoker team ana tsüingda March 14, 2021 nü Vijay Hazare Trophy final asayatsü.

BILEMDANGANG

"Tamajung dang bilemba jagi tajung inyaktsü meratetter."